



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka („Službeni glasnik BiH“, broj: 95/12 i 41/16), člana 25. Pravilnika o godišnjim finansijskim izvještajima političkih stranaka („Službeni glasnik BiH“, broj: 96/13 i 89/16) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“, broj: 103/08), izdajem

IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2019. GODINU PRVE MOSTARSKÉ PARTIJE

Broj: 03-07-6-546/20
Sarajevo, 23.03.2021. godine

SADRŽAJ

MIŠLJENJE REVIZORA	3
1. UVOD	4
2. PREDSTAVLJANJE POLITIČKE STRANKE	4
3. OPIS PREGLEDA I KONTROLE FINANSIJSKOG IZVJEŠTAJA	4
Predmet pregleda i kontrole	4
Cilj pregleda i kontrole	4
Obim pregleda i kontrole	5
4. PRETHODNE KONTROLE I REVIZIJE	5
5. NALAZI I PREPORUKE REVIZIJE	5
5.1. NALAZI	5
5.2. PREPORUKE	7

MIŠLJENJE REVIZORA

Služba za reviziju finansiranja političkih stranaka izvršila je pregled godišnjeg finansijskog izvještaja Prve mostarske partije za 2019. godinu.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka i uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Pregledom godišnjeg finansijskog izvještaja za 2019. godinu, utvrđeno je da je Prva mostarska partija prekršila odredbe člana 4. stav (1), člana 5. stav (4) i člana 12. stav (4) Zakona o finansiranju političkih stranaka.

Pregledom, odnosno kontrolom finansijskih izvještaja, osim gornjih napomena nismo zapazili ništa značajno, što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka.

1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je pregled godišnjeg finansijskog izvještaja Prve mostarske partije za 2019. godinu.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja, Prva mostarska partija se finansirala iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	1.896,00	14,48
2.	Prilozi fizičkih lica (3-a)	11.195,00	85,52
3.	Prilozi pravnih lica (3-b)	0,00	0,00
4.	Prihodi od imovine (3-c)	0,00	0,00
5.	Prihodi od dobiti preduzeća u vlasništvu političke stranke (3-d)	0,00	0,00
6.	Prihodi od poklona (3-e)	0,00	0,00
7.	Prihodi iz budžeta (3-f)	0,00	0,00
8.	Prihodi od propagande (3-g)	0,00	0,00
I	Ukupni prihodi (1-8)	13.091,00	100,00
II	Ostali prihodi i drugo	0,00	0,00
	Izvori finansiranja (I+II)	13.091,00	100,00

U godišnjem finansijskom izvještaju stranka je iskazala rashode u ukupnom iznosu od 8.257,05 KM.

2. PREDSTAVLJANJE POLITIČKE STRANKE

Naziv političke stranke je Prva mostarska partija. Skraćeni naziv stranke je PMP.

Prva mostarska partija registrovana je kod Općinskog suda u Mostaru, rješenjem broj: R/1-14 od 24.02.2014. godine.

Sjedište političke stranke je u Mostaru, ulica Maršala Tita 104.

Lica ovlaštena za zastupanje stranke su Semir Drljević, predsjednik stranke i Edin Hadžić, podpredsjednik stranke.

Lice ovlašteno za podnošenje finansijskih izvještaja za 2019. godinu je Senad Razić.

U godišnjem finansijskom izvještaju za 2019. godinu Prva mostarska partija je iskazala sljedeću organizacionu strukturu:

- Centrala.

3. OPIS PREGLEDA I KONTROLE FINANSIJSKOG IZVJEŠTAJA

Predmet pregleda i kontrole je godišnji finansijski izvještaj Prve mostarske partije za 2019. godinu.

Cilj pregleda i kontrole je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka. Ukoliko revizor na bazi kontrole finansijskog izvještaja utvrdi određena kršenja

navedenih zakona, ocjenjuje da li je potrebno izvršiti reviziju u prostorijama stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

Obim pregleda i kontrole finansijskih izvještaja Prve mostarske partije obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava.

4. PRETHODNE KONTROLE I REVIZIJE

Služba za reviziju izvršila je pregled godišnjih finansijskih izvještaja Prve mostarske partije u periodu od 2014. do 2018. godine, nakon čega su izdati izvještaji o pregledu sa mišljenjem revizora, nalazima i preporukama revizije.

Nakon izvršenog pregleda godišnjeg finansijskog izvještaja za 2018. godinu, Služba za reviziju je izdala Izvještaj o pregledu godišnjeg finansijskog izvještaja Prve mostarske partije sa mišljenjem revizora, nalazima revizije i preporukama stranci da uspostavi adekvatne evidencije o rashodima i obavezama u svojim poslovnim knjigama, odnosno da poslovne knjige vodi u skladu sa računovodstvenim propisima i da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka.

Nerealizovane preporuke:

Na osnovu uočenih nedostataka u godišnjem finansijskom izvještaju za 2019. godinu, utvrđeno je da Prva mostarska partija nije ispoštovala preporuke revizije.

5. NALAZI I PREPORUKE REVIZIJE

5.1. NALAZI

a) Prva mostarska partija je prekršila odredbe člana 4. stav (1)¹ Zakona o finansiranju političkih stranaka.

Prva mostarska partija je finansijska sredstva u iznosu 8.257,05 KM utrošila bez utvrđenog programa utroška sredstava za 2019. godinu, čime je prekršila odredbe člana 4. stav (1) Zakona o finansiranju političkih stranaka.

Prva mostarska partija nije Centralnoj izbornoj komisiji Bosne i Hercegovine dostavila program utroška sredstava za 2019. godinu uz godišnji finansijski izvještaj za 2018. godinu, niti je isti dostavila po Zahtjevu za dostavljanje dodatne dokumentacije za 2019. godinu².

Na osnovu navedenog utvrđeno je da stranka nije sačinila program utroška sredstava za 2019. godinu.

b) Prva mostarska partija prekršila je odredbe člana 5. stav (4) i člana 12. stav (4) Zakona o finansiranju političkih stranaka.

Pregledom godišnjeg finansijskog izvještaja za 2019. godinu, utvrđeno je da Prva mostarska partija nije prijavila nenovčanu donaciju, nije izdala potvrde donatorima o primljenim priložima, godišnji finansijski izvještaj nije podnijela u zakonom propisanom roku i na način utvrđen Pravilnikom o godišnjim finansijskim izvještajima političkih stranaka (u daljem tekstu: Pravilnik),

¹ Finansijska sredstva iz člana 3. stav (1) Zakona o finansiranju političkih stranaka može koristiti isključivo za ostvarivanje ciljeva utvrđenih svojim programom i statutom.

² Zahtjev broj: 03-07-6-546-2/20 od 22.09.2020. godine.

čime je prekršila odredbe člana 5. stav (4) i člana 12. stav (4) Zakona o finansiranju političkih stranaka.

- (1) Uvidom u poslovne knjige i izvode sa računa stranke, utvrđeno je da je stranka u godišnjem finansijskom izvještaju pogrešno iskazala promet ulaza i stanje transakcijskog računa na dan 31.12.2019. godine, čime je prekršila odredbe člana 11. Pravilnika.

Prva mostarska partija je u obrascu 2. finansijskog izvještaja (Pregled prometa svih transakcijskih računa političke stranke) iskazala transakcijski račun broj: 1011500067756597 kod Privredne banke Sarajevo, sa sljedećim podacima: početno stanje 18,80 KM, promet ulaza 15.513,80 KM, promet izlaza u iznosu od 11.075,51 KM i stanje na dan 31.12.2019. godine u iznosu od 4.457,09 KM.

Kontrolom prometa izvoda sa računa stranke utvrđeno je sljedeće: početno stanje 18,80 KM, promet ulaza u iznosu od 15.495,00 KM, promet izlaza u iznosu od 11.075,71 KM i stanje na dan 31.12.2019. godine u iznosu od 4.438,09 KM.

- (2) U obrascu 2.1 (Pregled stanja blagajne) finansijskog izvještaja stranka nije iskazala tačne podatke o početnom stanju u blagajni, prometu ulaza i izlaza i stanju blagajne na dan 31.12.2019. godine

U obrascu 2.1 stranka je iskazala sljedeće podatke o poslovanju putem blagajne: početno stanje u iznosu od 18,80 KM, promet ulaza u iznosu od 15.513,80 KM, promet izlaza u iznosu od 11.075,51 KM i stanje na dan 31.12.2019. godine u iznosu od 4.457,09 KM.

Uvidom u poslovne knjige stranke³ utvrđeno je sljedeće: početno stanje u iznosu od 2,84 KM, promet ulaza u iznosu od 15.741,00 KM, promet izlaza u iznosu od 15.741,40 KM i stanje blagajne na dan 31.12.2019. godine u iznosu od 2,44 KM.

Nepravilnim i netačnim popunjavanjem navedenog obrasca, stranka je prekršila odredbe člana 12. Pravilnika.

- (3) Uvidom u poslovne knjige utvrđeno je da stranka u godišnjem finansijskom izvještaju nije prijavila nenovčanu donaciju pravnog lica, čime je prekršila odredbe člana 5. stav (4) Zakona o finansiranju političkih stranaka i odredbe člana 13. i 18. Pravilnika.

U obrascu 3 (izvori finansiranja) godišnjeg finansijskog izvještaja stranka je iskazala ukupne prihode u iznosu od 13.091,00 KM.

Kontrolom poslovnih knjiga i uvidom u Završni račun stranke za 2019. godinu (Bilans uspjeha), utvrđeno je da su ukupni prihodi stranke iznosili 13.283,00 KM. Služba za reviziju je utvrdila da stranka u finansijskom izvještaju nije iskazala prihode po osnovu otpisanih obaveza prema pravnom licu „Face art“ d.o.o. Goražde u iznosu od 192,00 KM, koji su u poslovnim knjigama evidentirani na kontu 41730-Ostali prihodi.

Stranka je prihode po osnovu otpisanih obaveza prema dobavljaču u iznosu od 192,00 KM trebala iskazati u obrascu 3-e (nenovčane donacije i računi koje stranka nije imala obavezu da plati) godišnjeg finansijskog izvještaja.

- (4) Prva mostarska partija nije u skladu sa članom 6. Pravilnika izdala potvrde o priložima koje je primila od fizičkih lica, čime je prekršila odredbe člana 5. stav (4) Zakona o finansiranju političkih stranaka.

Naime, stranka je Centralnoj izbornoj komisiji Bosne i Hercegovine umjesto kopije potvrda o primljenim priložima dostavila kopiju blagajničkih primitaka.

³ Uvid u analitički konto 10010-Glavna blagajna stranke.

U skladu sa članom 6. stav (1) Pravilnika, politička stranka je dužna svakom fizičkom i pravnom licu od kojeg je primila članarinu ili prilog izdati potvrdu u kojoj su sadržani sljedeći podaci: naziv političke stranke, serijski broj potvrde, ukupan iznos članarine/priloga, ime i prezime/naziv donatora, broj ličnog dokumenta/identifikacioni broj donatora, adresa i mjesto prebivališta/sjedišta donatora, datum uplate, datum izdavanja potvrde i potpis ovlaštenog lica.

(5) Stranka u obrascu 5 (Obaveze političke partije) finansijskog izvještaja nije iskazala svoje obaveze, čime je prekršila odredbe člana 24. Pravilnika.

Uvidom u poslovne knjige stranke utvrđeno je da su obaveze stranke na dan 31.12.2019. godine iznosile 83,47 KM.

(6) Prva mostarska partija je godišnji finansijski izvještaj za 2019. godinu podnijela nakon zakonom propisanog roka, čime je prekršila odredbe člana 12. stav (4) Zakona o finansiranju političkih stranaka.

Politička stranka je godišnji finansijski izvještaj za 2019. godinu elektronski putem aplikacije FI CIK BIH podnijela dana 10.06.2020. godine, te u čvrstoj kopiji dostavila Centralnoj izbornoj komisiji Bosne i Hercegovine dana 15.06.2020. godine.

5.2. PREPORUKE

Preporučuje se Prvoj mostarskoj partiji da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da finansijska sredstva obezbijedena za finansiranje stranke koristi u skladu sa statutom i programom utroška sredstava,*
- *da u finansijskom izvještaju prijavljuje sve priloge, bez obzira na koji način ih ostvaruje, te da u skladu sa članom 6. Pravilnika o godišnjim finansijskim izvještajima političkih stranaka izdaje potvrde o prijemu priloga, i*
- *da finansijske izvještaje koje podnosi Centralnoj izbornoj komisiji Bosne i Hercegovine dostavlja u zakonom propisanom roku i popunjava u skladu sa Pravilnikom o godišnjim finansijskim izvještajima političkih stranaka.*

KOMENTAR:

U ostavljenom roku, Prva mostarska partija nije se očitovala na nalaze revizije i mišljenje revizora dato u Preliminarnom izvještaju o pregledu godišnjeg finansijskog izvještaja za 2019. godinu.

Šef Odsjeka za revizijske poslove

Sanja Tošović

Revizor

Nevenko Andan

Šef Službe za reviziju

Mr.sc Hasida Gušić

